

პატრიარქი: 'ვეცადოთ, როგორც პეტრე მოციქულს, წმინდა პავლე მოციქულსაც მივბაძოთ წმინდა ჯვრის სიყვარულში'



უწმინდესისა და უნეტარესის, სრულიად საქართველოს კათოლიკოს-პატრიარქის, მცხეთა-თბილისის მთავარეპისკოპოსის და ბიჭვინთისა და ცხუმ-აფხაზეთის მიტროპოლიტ შიო III-ის ქადაგება წმინდათა დიდებულთა და ყოვლადქებულთა თავთა მოციქულთა პეტრესა და პავლეს დღესასწაულზე

სახელითა მამისათა და ძისათა და სულისა წმინდისათა!

მაღალყოვლადუსამღვდელოესო მეუფეო,
მაღალღირსო მამა არჩილ,
ძვირფასო მამებო, ძმებო და დებო!

გილოცავთ პეტრე-პავლობის დღესასწაულს.

ძალიან სასიხარულო იყო დღეს თქვენთან ერთად წირვა. ისეთი წესრიგი, ისეთი სულიერი და ამაღლებული განწყობა იყო, რომ ძალიან გახარებული და მადლობლები ვართ. გაგახაროთ და დაგლოცოთ უფალმა!

დღეს ვმადლობთ და ვადიდებთ ღმერთს, რომ ცოდვილი სამყაროს წინაშე უფალმა აღმართა ასეთი საოცარი სვეტები და მნათობები, რომლებმაც არა მხოლოდ თავისი დიდებული ეპისტოლეებით, არამედ თავიანთი ცხოვრებითაც უქადაგეს მთელ მსოფლიოს ჭეშმარიტება და მაგალითი მოგვცეს ღვთის რწმენის და დიდი სიყვარულის.

ისინი დღესაც აგრძელებენ ქადაგებას.

წმინდა მოციქულმა პეტრემ მოგვცა დიდი მაგალითი რწმენისა, როდესაც ნავიდან გადმოვიდა და ზღვაზე მოსიარულე უფალ იესო ქრისტესკენ გაემართა სვლით. ჩვენც ასე უნდა მივდიოდეთ ქრისტესკენ და არასდროს შეგვეპაროს ეჭვი, რომ უფალი დაგვეხმარება ყველა განსაცდელში, ისევე, როგორც პეტრე მოციქულს დაეხმარა, რომელმაც ჩაძირვა დაიწყო.

პეტრე მოციქულმა გამოავლინა ასევე საოცარი სიმამაცე, როდესაც არ შეეშინდა და გეთსიმანიის ბაღში მღვდელმთავრის მონას მოუქნია მახვილი. თქვენ გახსოვთ, მერე უფალმა განკურნა ის მონა.

და აი, როდესაც ჩვენი თანდასწრებით შეურაცხყოფას აყენებენ უფალს, აგინებენ დედა ღვთისმშობელს, როგორც პეტრემ, გაბედული სიტყვით უნდა ვამხილოთ ასეთი ადამიანები. რა თქმა უნდა, მოციქულ პეტრესგან უნდა ვისწავლოთ საოცარი სინანულიც. ხომ გახსოვთ, ის მთელი სიცოცხლე ინანიებდა თავის მძიმე ცოდვას – უფალ იესო ქრისტეს სამგზის უარყოფას.

დღეს შეუძლებელია ყველაფერზე საუბარი, ამ დიდებული მოციქულების ღვანლზე, დამსახურებაზე.

რაც შეეხება პავლე მოციქულს, ალბათ გედმეტია ლაპარაკი იმაზე, რა დიდი მნიშვნელობა აქვს მის ეპისტოლეებს ჩვენი რწმენისთვის, ჩვენი სულის ცხოვრებისთვის. ალბათ დღეს საკმარისია ისიც კი ვახსენოთ, ძვირფასო მამა არჩილ, როგორ ღრმად ესმოდა მას ქრისტიანული სიყვარულის მნიშვნელობა და სიღრმე. რა საოცარია მისი სიტყვები კორინთელთა მიმართ ეპისტოლეში, „სიყვარულის ჰიმნად“ წოდებული ცნობილი მონაკვეთიდან. ის წერს, წინასწარმეტყველების მაღლიც რომ მქონდეს, ყველა საიდუმლოც რომ ვიცოდე და ისეთი რწმენა მქონდეს, რომ მთების დაძვრა შემეძლოს, სიყვარული თუ არ მაქვს, არარა ვარ, მხოლოდ მოჟღერიალე რვალი ვარ. მთელი ჩემი ქონება გლახაკებს რომ დავურიგო და სხეული მივცე დასაწვავად, სიყვარული თუ არ მაქვს, არას მარგებსო (1 კორ. 13, 2-3).

წმინდა პავლე მოციქული ამ სიყვარულზე მხოლოდ კი არ წერდა, როგორც არავინ სხვა, არამედ ასევე ცხოვრობდა და იწვოდა ამ სიყვარულით, ქრისტეს სიყვარულით, როგორც სხვა არავინ. იგი იმდენად შეძრა ქრისტეს ჯვარცმამ, რომ სხვა ყველაფერმა მისთვის ამ დედამიწაზე აზრი დაკარგა. ის წერს ასეთ სიტყვებს: ამიერიდან ჩემთვის ჯვარცმულია ეს ქვეყანა და ქვეყნისთვის კიდევ მე ვარ ჯვარცმული (გალატ. 6, 14). ის იმდენად მოცული იყო ქრისტეს სიყვარულით, ისე გრძნობდა იესო ქრისტეს ჯვარცმას, მის ჭრილობებს, რომ ამბობს: მე ჩემი სხეულით დამაქვს ქრისტეს ჭრილობებით (გალატ. 6, 17).

ძვირფასო ძმებო და დებო, ვეცადოთ, როგორც პეტრე მოციქულს, წმინდა პავლე

მოციქულსაც მივბაძოთ წმინდა ჯვრის სიყვარულში, ასევე შევიგრძნოთ ჯვარი უფლისა და ვეცადოთ, არცერთი დღე ჩვენს ცხოვრებაში არ გადიოდეს ქრისტეს ჯვრის გახსენების, მისი მნიშვნელობის გააზრებისა და პირჯვრის გადასახვის გარეშე და არ დაგვაკინცდეს პავლე მოციქულის ცნობილი სიტყვები: „რჯულის აღსრულება სიყვარულშია“ (რომ. 13, 10).

თუ ასე ვიცხოვრებთ, თუ ვეცდებით, ასე ვიცხოვროთ, მაშინ ჩვენს გულებშიც გამოისახება ქრისტეს ჯვარი და მცირედ მაინც მივემსგავსებით მოციქულებს, რომელთა გულებშიც გამოისახა და ზეციური ნათლით ანათებდა ჯვარი უფლისა ჩვენისა იესო ქრისტესი.

კიდევ ერთხელ გილოცავთ დღევანდელ დღეს. კიდევ ერთხელ მადლობას მოგახსენებთ ამ დიდი სიხარულისთვის, ერთობლივი მსახურებისთვის. ღმერთმა დაგლოცოთ და გაგაძლიეროთ!

წმინდათა მოციქულთა თავთა პეტრესა და პავლეს ლოცვით, ღმერთმა აკურთხოს, გააძლიეროს, გაახაროს ამ ტაძრის მამები, წინამძღვარი – დეკანოზი არჩილი, თქვენ, ძვირფასო ძმებო და დებო!

ღმერთმა წმინდა თავთა მოციქულთა პეტრესა და პავლეს ლოცვით, გაამთლიანოს და გადაარჩინოს სრულიად საქართველო, ამინ!

ჩვენთან არს ღმერთი!

თბილისის (ავლაბრის) წმინდა მოციქულთა თავთა, პეტრესა და პავლეს სახელობის ტაძარი

12 ივლისი, 2026 წელი

ელექტრონული ვერსია მოამზადეს ანზორ ჩიქობავამ და თამარ ასათიანმა

ფოტო: ნინო სოზაშვილი

sazu.ge